

四庫全書

子部

欽定四庫全書

子部

庫書考索卷五十三  
五

詳校官中書臣竇汝翼

主事臣祁韻士覆勘

總校官知縣臣楊懋珩

校對官中書臣張九譚

謄錄監生臣姚元開

欽定四庫全書

羣書考索卷五十三

宋 章如愚 撰

律歷門

律呂類

昔者黃帝吹九寸之管得黃鍾正聲半之為清聲  
倍之為緩聲三分損益之以生十二律十二律還相  
為宮以應十二月之律此律之正也至於周禮九  
變之樂宮商徵羽之法考之七始之次序乃雜然

而不同也周禮之變為人思而作人以情相合大  
呂太簇應鍾律之相合者也將以致人思則安得  
以相生之正體而必其同歟音律之用自是而變益  
不窮掌者於是求為法以通之京房之六十律通  
十二律之法也房受學於焦延壽既以律呂之本衍  
而相生始於黃鍾極於中呂然後又立執始去滅  
南事之名以畢之其為術亦精矣五音之叙宮商  
必濁徵羽必清正也然律呂之用或相配而成或

相反而生其清濁豈得獨有定體耶黃鍾之宮在十始  
之次則太簇為商而濁在九變之叙則太簇為徵而清  
可疑也五音之宮商角為正徵羽為變固也然五聲之  
作其配則金木水火土其象則君臣民事物臣與民不  
可變變者君與事而已是故有變宮變徵而無變商角  
羽何分之瀆哉若所謂積黍為律之制此又古人定律  
之法後世學者紛紛於短長廣狹之辨而不一也古者  
因一桴二米之黍以起數由一黍之多積而至於律度

量衡皆以黍而定後世之黍未必皆與古同學者之法  
不生於自悟之心而責諸不同之黍其惑亦宜矣要之  
公孫崇之以長累寸即李照之以橫累寸也李照之以  
橫累尺即劉芳之以廣積分即胡瑗之以橫累尺也差  
之毫釐繆以千里安得以不求法於心以斷之哉

陸唐

老策

律定於尺樂主於音音生於律律定于尺尺成于  
黍黍既不具尺亦不定尺無所準律亦自差古者神瞽  
考中聲而量之以律所以立均出度也司馬遷黃鍾之

律八寸七分之一太簇七寸七分之二林鍾五寸七分  
之四應鍾四寸二分之三班固司馬彪說黃鍾長九寸  
聲最濁太簇長八寸林鍾長六寸應鍾長四寸七分四  
釐強聲最清蔡邕鄭玄杜夔荀勗等所論尺有損益而  
黃鍾之宮要以九寸為定始荀勗當武帝泰始中校大  
樂八音不和知漢到魏尺長於古四分有餘乃部著作  
郎劉恭依周禮制尺所謂古尺也後汲冢得古周時玉  
律及鍾磬與新律闇同于時郡國或得漢時故鍾吹勗

律以命之其聲皆應時人稱其精密

徐古編

樂有所

謂本中聲者樂之本亦有所謂末器者樂之末也秉本以正末若挈裘振領之易也就末以齊本猶治絲而棼之也先王之作樂豈徒事其干戚羽毛鍾磬管籥綴兆疾徐以為世俗觀美哉探天地之至赜求陰陽之妙義得所謂中聲者黃鍾之宮也揚子曰黃鍾以生之中正以平之禮曰量聲中黃鍾之宮月令曰律中黃鍾之宮則黃鍾信乎其為樂本也黃鍾以一生三以三而生九



九而九之終於八十一其管所以九寸而餘律自此生也揚雄之作太玄也以一元生三方三方生九州九州生二十七部二十七部生八十一家而其音之辭則曰陽氣潛萌於黃鍾之宮信乎無不在其中是則玄之文高極蒼天深入黃泉大也包畛纖也企戚良由求黃鍾之法而創為方州部家也夫得黃鍾之法猶足以草玄又况以是而制作烏不足以考中聲哉黃帝之雲門頤帝之五莖而帝嚳之六英堯之咸池舜之簫韶禹之大

夏湯之大濩武之大武成王之大酌樂名雖異其中聲之和未始不本於黃鍾也是以奏之園丘則神明降用之方澤則地祇昇搏拊球石則百獸率舞樂終九成則瑞禽來翔此德音之音雅樂之情也三代而下號為博識之士相與論譔定次多矣由漢已來則有京房六十二律由唐以來則有祖孝孫之八十四調因而轉相祖述又從而損益高下之其間祖意決著眉睫之論無所考者類皆棄經任傳徒紛紜為此贅疣也彼烏知所謂中

聲哉古語有曰黃鍾委弃瓦釜雷鳴吾知殆為此曹設也夫欲樂之聲清不太輕濁不太重高不至於揚下不至於抑大不過宮細不過羽當以黃鍾之中聲求之也

三山疑難要折

前漢志律以統氣類物呂以旅陽宣

氣周景王時鑄無射問律於伶州鳩對曰律所以立均出度也紀之以三平之以六成於十二一曰黃鍾所以宣養六氣九德也二曰太簇所以金奏贊陽出滯也三曰姑洗所以羞潔百物考神納賓也四曰蕤賓所以安

靖神人獻酬交酢也五曰夷則所以詠歌九則示平民無貳也六曰無射所以宣布哲人之令德示民軌儀也為之無間以揚沉伏而黜散越也元間大呂助宣物也二間夾鍾出四隙之細也三間中呂宣中氣也四間林鍾和展百事俾莫不任肅純恪也五間南呂贊陽秀也六間應鍾均利器用俾應復也皆所以述時氣效節物也

五音尊卑清濁月令孟春其音角注云角數六十四屬木者以其清濁中民象也正義曰凡數多者濁數少者

清今宮數八十一商數七十二徵數五十四羽數四十  
八角數六十四少於宮商多於徵羽故云清濁中既尊  
者為濁卑者為清民則卑於君臣尊於事物亦是尊卑  
之中故云民之象也案樂記及律歷志云宮為君商為  
臣角為民徵為事羽為物羽屬北方其數少所以黃鍾  
在子其數多者冬時凝寒之氣在於地土水又清輕羽  
既稟寒氣又象水聲故其數少冬至陽氣伏於地下溫  
積土中黃鍾含藏陽氣又象土聲故其數多各自為義

不相須也凡聲尊卑取象五行者宮主土土聲濁其數多故主君商主金金聲稍重其數稍多故為臣角主木木聲清濁中其數多少中故為民徵主火火聲稍輕其數少故為事事謂人之所營事務也羽主水水聲極輕其數最少故為物也物謂人之所用財物也月令季夏之末云中央土其音宮正義云案律歷志五聲始於宮陽數極於九九九相乘故數八十一以五聲中最尊故云君之象春三月其音皆角夏三月其音皆徵秋三月

其音皆商冬三月其音皆羽

八音本五聲說心感於內情形於外而單出者樂之聲也曲折成萬交錯成文而雜出者樂之音也樂發聲則中之為宮章之為商觸之為角徵之為徵宇之為羽此五聲原於五行也五方於器則金石以動之絲竹以行之匏以宣之瓦以贊之革木以節之此八音所以逐八風也大司樂曰凡樂皆文之以五聲播之以八音傳曰五聲和八音諧而樂成此五聲八音而成之者也然五

聲者八音所從出也故金尚羽石尚角瓦絲尚宮匏竹  
尚徵而無清濁之常革木一聲而無清濁之變其說以  
謂律呂和五聲施之八音合以成樂也是則知音必自  
聲始故曰不知音者不可與言聲不知聲者不可言樂  
案書曰聲依永律和聲繼之以八音克諧無相奪倫則  
音本於聲者明矣

三山要會

律呂相生京房易云十二律得位者生五子失位者生  
三子不失不得生四子五律得位各生五子謂黃鍾太



簇姑洗林鍾南呂也五五二十五并五凡三十也失位  
者生三子亦五半謂大呂夾鍾中呂夷則無射三五十  
五并本五凡二十二十就三十合成五十也不得不失  
者生四子謂蕤賓黃鍾也二四為八并本二為十也十  
就五十合為六十也言其得位者謂以陽居陽以陰居  
陰失位者謂以陽居陰以陰居陽不失不得者處陰陽  
交際之間也又黃鍾太簇等七律各統一月自為宮其  
餘五十三律隨所生月六七等為其月之宮則周一期

月數如京房所述然其所生者則黃鍾生色育執始大  
呂生分否陵陰之類是也其上三分益一下生三分去

一皆漢書律歷志云

禮記正義

續通典云漢書所載

律呂相生皆一上一下起黃鍾九寸為首展轉生之終於  
仲呂得十二律所云下生者謂長管生短管也所謂上  
生者謂短管生長管也皆云三分其管而損益之應下  
生者損其一分應上生者益其一分各得其所生之管  
長短之數是則損長為短益短為長也假如黃鍾九寸

之管分作三分每分合有三寸計九寸除其三分自然合成六寸即得六月林鍾之管謂之下生也如以林鍾六寸之管分作三分即三分合有二寸即此之數加於六寸之上自然合成八寸即得正月太簇之管謂之上生也盡十二管其例一同陽下生陰陰上生陽然則准黃鍾林鍾太簇三管各得全寸之分餘外九管則有微分之數中三分損益自然之所致也據漢志又司馬遷等本法皆三分十月應鍾益一上生五月蕤賓損一下

生十二月大呂若用此法則大呂之管惟長四寸有奇此是漢志一上一下之法而京房等遂從五月蕤賓又重上生十二月大呂緣此大呂夾鍾仲呂三管各於漢志本數之上三分益一以為生於是六呂之管添長八寸有奇夾鍾之管添長七寸有奇仲呂之管添長六寸有奇餘之九律並依漢志不改所以蕤賓本合下生大呂而遂改為上生因與應鍾重生上也緣大呂一管改作上生所以自大呂以下相生咸易漢志上下之號故

大呂本合上生夷則而遂改為下生也夷則本合下生夾鍾而遂改為上生也夾鍾本合上生無射遂改而為下生也無射本合下生仲呂而遂改作上生也案晉書律歷志云五音之體務在和聲益則加倍損則減半其於本音常為無爽然則言上生下生者相生之道也言重上生者吹候之用也於筵賓重一生者通為用之數故言律者因焉非相生之正謹案晉書此說猶未盡其義何者既云其於本音常為無爽何更云非相生之正

耶案所以旋賓重上生大呂者亦不獨在取聲和以及吹候之用也其本意蓋取排管餘殺欲使一例均同耳律呂乘之數禮運曰五聲六律十二管還相為宮也鄭玄注云宮數八十一黃鍾長九寸九九八十一也三分宮之一生徵徵數五十四林鍾長六寸六九五十四也三分徵益一生商商數七十二太簇長八寸八九七十二也三分商益一生羽羽數四十八南呂長五寸三分寸之一五九四十五又三分寸之一為四十八也三分

羽益一生角角數六十四姑洗長七寸九分寸之一七  
九六十三又九分寸之一為六十四也三分角去一生變  
宮三分變宮益一生變徵自此以後則隨月而變所謂  
還相為宮 三場指南

聲律生於日辰揚子雲曰聲生於日律生於辰取法於  
五行十二辰之義也聲生於日日有五故聲亦有五日  
謂甲巳為角乙庚為商丙辛為徵丁壬為羽戊癸為宮  
是五行合為五日五音之聲生於日也律生於辰者十

二律出於十二辰子為黃鍾之類是也

律呂傳後之說唐禮樂志云聲無形而樂有器古之作樂者知夫器之必有弊而聲不可以言傳益懼器失而聲遂亡也乃多為聲以著之故始求聲者以律而造律者以黍自一黍之廣積而為分寸一黍之多積而為龠合一黍之重積而為銖兩此造律之本也故為之長短之法而著之於度為之多少之法而著之於量為之輕重之法而著之於權衡是三物者亦必有時而弊而又



摠其法而著之於數使其分寸龠合銖兩皆起於黃鍾  
然後律度量衡相用為表裏使得律者可以制度量衡  
因度量衡亦可以制律不幸而皆亡則推其法數而制  
之用其長短多少輕重以相參攷四者既同而聲必至聲  
至而后樂可作矣夫物用於有形而必弊聲藏於無形  
而不竭以有數之法求無形之聲其法具存無作則已  
苟有作者雖去聖人於千萬歲後無不得焉此古之君  
子知物之終始而憂世之慮深其多為之法而丁寧纖

悉可謂至矣三代既亡禮樂失其本至其聲器有司之  
守亦以散亡自漢以來歷代莫不有樂作者各因其所  
學雖清濁高下時有不同然不能出於法數至其所以  
用於郊廟朝廷以接人神之歡其金石之響歌舞之容  
則各因其功業治亂之所起而本其風俗之所由

黃鍾之宮月令中央土律中黃鍾之宮正義云黃鍾之  
宮於諸宮為長季夏土王其聲最重謂土之聲氣應此  
黃鍾之宮聲非黃鍾一聲也黃鍾候氣之管本位在子

此是黃鍾宮聲與中央土聲相應但土無候氣之法取黃鍾之宮聲以應土耳非候氣也故賀瑒云黃鍾是一月管何緣復應此月正以土義居中故虛設律於其月實不用候氣也是以此項注云季夏氣到則黃鍾之宮應直言律中黃鍾之宮不言律應者明謂中央土聲與黃鍾為宮音相應非為氣應也蔡氏及熊氏以為黃鍾之宮謂黃鍾少宮半黃鍾九寸之數管長四寸五分六月用為候氣案六月林鍾之律長六寸七月夷則長

五寸三分有餘何以四寸五分之律於六月候之乎又土聲最濁何以與黃鍾半聲相應乎其說非也

不云黃

鍾律最長而云黃鍾之宮最長者惟黃鍾宮聲於諸律

最長故云黃鍾之宮也

禮記正義曰國語云黃鍾所以宣

養六氣九德案彼注十一月建子陽氣在中六氣陰陽風雨晦明九德金木水火土穀正德利用厚生作事宣徧黃鍾象氣伏地物始萌所以徧養六氣九功之德若施於人六情正德天德利用地德厚生人德也

變宮變徵說夫五音相生而獨宮徵有變聲何也宮為君商為臣角為民徵為事羽為物君也者法制號令之所自出也宮故生徵法度號令所以授臣臣所以奉承者也徵故生商君臣一德以康庶務則萬物得所民遂其生矣故商生羽羽生角也然臣有常職民有常業物有常形不可以遷遷則失其常矣商羽角三聲此其所以無變也君摠萬務不可執以一方事通萬務不可滯於一隅故宮徵二聲必有變也

鍾律月令注曰律候氣之管以銅為之律中者中猶應也孟春氣到則太簇之律應應謂吹灰也正義云角是春時之音律審正月之氣音由氣成以其音氣相須故角律同處其太簇夾鍾六律六呂等皆是候氣管名又計太簇管數倍而更半鑄之為鍾名曰太簇之鍾元生於太簇之律是律在於前鍾生於後故律歷志云黃帝制十二筩以聽鳳凰之鳴其雄鳴則為六律雌鳴為六呂是律生在前蔡氏以為太簇鍾名先有其鍾後有其

律非也陽管為律陰管為呂又陰律利同言與陽同也  
摠而言之陰陽皆稱律故十有二月皆稱律中也

律管案司農注周禮陽律以竹為管陰律以銅為管鄭  
康成則以皆用銅為之案律歷志量者龠合升本之黃  
鍾之龠而五量加之其法皆用銅聲中黃鍾以此準之  
故知用銅也司農云陽律以竹陰律以銅非也律應謂  
之吹灰者蔡邕云其法為室三重戶閉塗苴必周密布  
緹縵室中以木為案每律各一案內庫外高從其方位

加律其上以葭灰實其端其月氣至則灰飛而管通也  
熊氏云謂作十二律管於室中四時位上埋之取蘆葦  
燒之而實之律管中以羅縠覆之氣到則吹灰動縠矣  
律空圍九分凡律空圍九分者以黃鍾為諸律之首諸  
律雖長短有差其圍皆以九分為限孟康云林鍾長六  
寸圍六分則圍之大小隨管長短然則分寸之數不可  
定故鄭氏皆以為圍九分也

九數鄭氏注周禮保氏九數云方田粟米差分少廣商



功均輸方程羸不足旁要今有重差夕桀句股也禮記  
正義云九數之名書本多誤儒者所解方田一粟米二  
差分三少廣四商功五均輸六方程七羸不足八旁要  
九今有重差句股者鄭司農指漢時云今世於九數之  
內有重差句股二篇其重差即為舊數差分也去舊數  
旁要而以句股替之為漢之九數即今之九章也馬融  
千寶等更云今有夕桀各為一篇未知所出今依鄭司  
農注周禮之數餘並不取

禮記正義

度量權衡書乃

同律度量衡三代式遵斯制秦滅學之後紛紜莫定漢書曰夫推歷生律制器規圓矩方權重衡平唯繩嘉量探賖索隱鉤深致遠莫不用焉度長短者不失毫釐量多少者不失圭撮權輕重者不失黍累紀於一協於十長於百大於千衍於萬其法在算術宣于天下小學是則職在太史羲和掌之度者分寸尺丈引也所以度長短也本起黃鍾之長以子谷秬黍中者

子北方北方黑

謂黑黍也一黍之廣度之九十分黃鍾之長

黃鍾九寸

一為一分十分為寸十寸為尺十尺為丈十丈為引而五度審矣量者龠合升斗斛也所以量多少也本起於黃鍾之龠用度數審其容以子谷秬黍中者千有二百實其龠以井水準其槩十龠為合十合為升十升為斗十斗為斛而五量嘉矣權者銖兩斤鈞石也所以稱物平施知輕重也本起於黃鍾之重一龠容千二百黍重十二銖兩之為兩二十四銖為兩十六兩為斤三十斤為鈞四鈞為石權與物鈞而生衡衡運生規規負生矩

矩方生繩繩直生準準正則平衡而鈞權矣是謂五則也位於北方太陰為智為水水曰潤下智者謀謀而深故為權北方之義也大小有准輕重有數各應其象五權謹矣度以忝起亦以絲起隋志曰孫子算法云蠶所生吐絲為忽十忽為杪十杪為毫十毫為釐十釐為分此皆起度之源

斛數秉莒稷耗儀禮聘禮云十斗曰斛十六斗曰藪

色

縷反十藪曰秉

秉十六斛為江淮之間量名有為藪者

今文藪為愈二百四十斗謂一車之米秉有五藪四秉

曰莒此秉謂刈禾盈手之秉也莒音才竹反者也若今

萊易之間刈稻聚把有名為莒毛詩云彼有遺秉又云

此有不斂穧十莒曰稯總十稯曰秬秠四百秉為一柏

一車之禾三稯為十二百秉三百莒三十稯也

王制言古尺周尺玉人職云圭尺有二寸又云桓圭九寸是周猶以十寸為尺也王制云以周尺六尺四寸為步乃是六十四寸則謂周八寸為尺也或言周尺八寸

鄭即以古周尺十寸為尺八尺為步則步八十寸鄭又以今周尺八寸為尺八尺為步則今步皆少於古步一十六寸以此計之則古之四步剩出今之一步古之四十步為今之五十步古之八十步為今之一百步則合云古者百畝當今百五十六畝二十五步古者百里當今百二十五里今王制乃曰古者百畝當今東田百四十六畝三十步古者百里當今百二十一里六十步四尺一寸二分與此不相應者蓋六國時變亂法度經文

散亂不可用也

禮記正義

周有十寸之尺有八寸之

尺家語曰布指知寸布手知尺投壺記曰籌室中五扶堂上七扶公羊傳曰膚寸而合鄭氏曰鋪四指曰扶一指按寸何休曰側手為膚按指為寸扶即膚耳然則寸尺之度取諸身也漢律歷志曰一黍之廣為分十分為寸十寸為尺然則寸尺之廣又取諸物也先王制法近取諸身遠取諸物足以考信而無疑焉然後尺寸之度起矣則指尺之與黍尺一也黍有巨細故尺有長短先

儒以黍之巨者積而為寸則於膚指不合於是有指黍  
二尺之辨謂圭璧之屬用指尺冠冕尊彝之屬用黍尺  
豈其然乎周禮典瑞羨以起度考工記璧羨度尺好三  
寸以為度璧徑九寸羨而長之從十寸廣八寸同謂之  
度尺則周之法十寸八寸此皆為尺也考工記於案言  
十有二寸於鎮圭言尺有二寸此十寸尺之證也說文  
曰咫八寸周尺也王制曰周尺八尺為步今以周六尺  
四寸為步六尺四寸乃八尺亦此八寸尺之證也隋書



所載歷代之尺至有一十五種蓋古尺既廢後世長短

異同之論遂不一也

陳禮書

造歷之時太史公之為律書其始不言律而言兵不言  
兵之用而言兵之偃及言兵之偃而言漢文帝尤加詳  
焉既曰陳武請伐朝鮮而文帝以謂願且臨邊設候結  
和通使由是而天下富庶鷄鳴狗吠煙火萬里可謂和  
樂者矣又曰文帝之時能不擾亂由是而百姓遂安耆  
老之人不到市廛遊遨嬉戲如小兒狀嗚呼若太史公

者可謂知制律之時而達制律之音者也何則文帝時  
偃兵息民結和通使而天下安樂則民氣歡洽陰陽協  
和而天地之氣亦隨以正苟制律以候之其氣之相應  
自然知音律之為是其氣之不合自然知音律之為非  
因天地之正氣以定三代之正律律有不可定者乎古  
人所謂天地之氣合以生風天地之風氣正而十二律  
定殆謂是歟

後周正律唐製十二和樂合四十曲八十四調又有九

功九德之舞開元中更造三和樂郊廟元會冊命大禮  
則用之自漁陽入寇樂工散亡樂音不嗣周世宗留意  
雅樂時王朴竇儼俱號知音顯德中命朴儼考正八音  
為一代之樂朴乃以古黑黍之法以審其度造成律呂  
以定六律六呂旋相為宮之義

續通典

宋朝考正音律五代之亂禮樂之制寂然無聞太祖雖  
在兵革之間注意於禮樂之內故和峴之徒因周人舊  
樂創為一代之制其為典則有龍安高安之異其為舞

則有文德武德之殊用之宗廟而交神人之慶也以至  
太宗增琴阮之制真宗新隨月之律厥後李照參考和  
峴之徒而黃鍾之音或近於太簇峴遂改造而調又高  
則是和峴失之於清而李照失之於濁也於是又制神  
龜紫芝甘露嘉禾玉兔之歌謂之五瑞又假律鑄十二  
鍾設黃鍾大呂太簇夾鍾以附四清聲之次以奏朝會  
登歌此其所以有雅鄭之異也 皇祐中仁宗祀明堂  
遂銳意樂律詔訪天下通知音律之士而胡瑗阮逸之

徒相繼而起瑗以上黨之忝考正鍾律而鍾之不合於古制者三磬之不合於古制者七莫不按古樂為之仁宗遂造七均十二律造乾安之曲制化俗右文武功睿德之舞與夫大善大宰大順大慶大定大盛大明之舞相間之郊廟明堂故一代之典鼎新大備蓋由先和民心後正律呂而然也

羣書考索卷五十三

欽定四庫全書

羣書考索卷五十四

宋 章如愚 撰

歷數門

歷類

歷數之起尚矣伏羲畫八卦以象二十四氣炎帝分  
八節以紀農功皇帝迎日推策乃使羲和占日常儀  
占月車區占星氣大撓造甲子隸首作算數容成綜  
斯六術考定氣象建五行察微歛起消息正閏餘述

而著焉謂之調歷洎于少昊以鳥名官而鳳鳥氏實為歷正玄鳥氏司分伯趙氏司至青鳥氏司啓丹鳥氏司閉顓帝則南正重司天北正黎司地建孟春以為元是為歷宗其後三苗亂德二官咸廢而閏餘乖次孟陬殄滅攝提失方堯復黎育重之後使纂其業

西漢志

書曰乃命羲和欽若昊天歷象日月星辰敬授人時晷三百有六旬有六日以閏月定四時成歲

夏至太康羲和廢職唐一行曰湯作商歷以十一月甲



子合朔冬至為上元又曰商歷得庚寅一分周歷得巳  
丑二分武王訪箕子言大法九章而五紀明歷法故自  
商周咸正歷紀以應天道周衰天子不班朔魯歷不正  
以閏餘一之歲為薜首故春秋襄二十七年十一月乙  
亥朔日有食之於是辰在申司歷以為在戌史書建亥  
哀十二年亦以建申流火之月為建亥而恠蟄虫之不  
伏也自文公閏月不告朔至此百有餘年莫能正歷數  
五伯之末史官所紀惟有黃帝顓帝夏商周及魯歷秦

兼天下用顓帝歷推五勝而自以為獲水德乃以十月

為正色尚黑

前漢志

後漢志曰黃帝造歷元起辛卯

而顓帝用乙卯虞用戊午夏用丙寅周用丁巳魯用庚

子秦用乙卯漢初因之

漢興歷凡五變初襲秦正朔以張蒼言用顓帝歷比於  
六歷䟽闊中最為微近然正朔服色不覩其真而晦朔  
月見弦望滿虧多非是蒼傳曰蒼為計相善筭歷以高  
祖十月始至霸上故因秦時本十月為歲首推五德之

運以為漢當水德尚黑如故漢家言歷者本張蒼追文  
帝詔公孫臣立土德時歷制度蒼由此絀著十八篇言  
陰陽律歷事此漢初用顓帝歷也武帝元豐七年漢興  
百二歲公孫卿壺遂司馬遷等言歷紀壞廢宜改正朔  
上與倪寬等議曰推傳序文則今夏之時也其以七年  
為元年於是遂詔卿遂遷與侍郎尊大典星射姓等議  
造漢歷乃以前歷上元泰初四千六百一十七歲至元  
封七年復得闕逢攝提格之歲中冬十一月甲子朔旦

冬至日月在建星

即牽牛也

太歲在子巳得太歲初本

星度新正姓等奏不能為筭願募治歷者更造密度各  
自增減以造太初歷乃選鄧平等及與民間治歷二十  
餘人唐都洛下閎與焉部分天部而閎運筭轉歷其法  
以律起歷曰律容一龠積八十一寸則一日之分也故  
黃鍾紀先氣之謂律律法也莫不取法焉與鄧平所治  
同於是皆觀新星度日月行更以推算如閎平法名曰  
陽歷元朔月生陰歷朔而後月乃生乃詔遷用鄧平所

造八十一分律歷罷廢尤疏遠者十七家復使淳于陵渠覆太初歷晦朔望皆最密日月如合璧五星如連珠遂用鄧平歷後二十七年元鳳三年也張壽王言黃帝調律歷漢元以來用之今不調宜更歷之過也詔鮮于妄人詰問壽王不服請與麻光等雜候鈞校諸歷詔雜候上林清臺課歷疏密凡十一家壽王課疎遠壽王所治乃商歷漢元年不用黃帝調歷復候盡六年太初歷第一徐萬且徐禹治太初歷亦第一壽王季信治皇

帝調歷皆䟽闊壽王又妄言太初虛四分日之三去小  
餘七百五分以故陰陽不調竟以下更歷之本驗在於  
天自漢歷初起盡元鳳六年三十六歲而是非堅定蔡  
邕曰太初用丁丑唐一行亦曰元起丁丑推而上之皆  
不值甲寅東都李洪難張衡曰太初多一日冬至日值  
斗而云在牽牛踈闊不可復用獨衡以為密近邊詔曰  
太初至永平十一年百七十歲進退餘分六十三治歷  
者不知處之推得十二度弦望不知初廢述者得切其

說

此武帝太初歷也孝成世劉向總六歷列是非作五  
紀論子歆究其微妙作三統歷及譜以說春秋推法要  
密其歷曰經元一以統始易太極之首也春秋二以目  
歲易兩儀之中也於春每月書王易三極之統也於四  
時雖無事必書時月易四象之節也時月以建分至啓  
閉之分易八卦之位也象事成敗易吉凶之効也朝聘  
會盟易大業之本也易與春秋天人之道也以易窮則  
變之數為閏法以參天九天終數兩地十地終數為會

數以天數二十五地數三十即易天地之數五十有五也為朔易之會是為會月以會數乘之周於朔旦冬至

也章月至日同朔謂之章閏月是為統歲三統為元歲

又曰夏數得四時之正也三代各據三統也黃鍾為天統始施於子半為天正林鍾為地統受於丑初而畢於辰也天地生物自十二月至三月畢為地正太族為人

統受於寅初而成於申為人功自正月至七月畢故歷

數三統天以甲子夏正月朔地以甲辰商正月朔人以



甲申周正月朔孟仲李迭用事為統首邊韶曰歆驗之  
春秋參以易道唐一行曰三統歷以己卯為堯商之歲  
非也今三統歷自太初至開元朔後天三日數而上之  
以至周初先天之失蓋益甚焉班固謂其要密著于漢  
志且贊曰三統歷譜考步日月五星之度有意其推本  
之也然歆之歷追考春秋所書三十六食僅得其一故  
杜預考古今十歷以驗春秋乃知三統之最踈此劉歆  
三統歷也以上並西漢志後漢志曰自太初元年開三

統歷施行百餘年歷稍後天朔先歷朔或在晦月建武  
中朱浮許淑等言歷不正當改天下初定未遑至永平  
中詔楊岑課弦望官歷皆失復令張盛景防鮑鄴等以  
四分法與岑課盛等所中多岑六事四分之衍始頗施  
行是時盛防未明歷元但用弦望而已至元和二年太  
初失天益遠章帝知其錯謬故召治歷編訢李梵詔改  
行四分歷而訢梵尤以為元首十一月當先大帝使賈  
逵問衛承李崇等以為月當先小勅無拘歷已班天元

始起之月當小歷遂定永元中復以九道法候弦望無  
差安帝延光中亶誦言當用甲寅元梁豐言當復太初  
詔公卿施延等議太初過天日一度弦望失正元和改  
從四分雖密於太初復不正皆不可用甲寅元與天相  
應合圖讖可施行李洪議四分歷起圖讖最正不宜易  
甲寅元多失未可取正上納其言順帝漢安二年邊韶  
上言章帝以保乾圖三百年斗歷改憲之文就用四分  
以庚申為元無明文按弦望足以知之准百官議虞恭

常訢等言建歷之本必先立元元正然後歷可成四分  
歷仲紀之元起文帝後元三年歲在庚辰止四十五歲  
歲在乙未歷度與天相應不可復尚君更三聖

光武創

之孝明放之章帝行之

其元則上統開闢其數則復古

四分宜如甲寅奏可靈帝熹平中馮光陳晃言歷元不  
正蔡邕議曰太初歷行百八十九歲章帝改從四分元  
用庚申今光晃以庚申為非甲寅為是及用四分以來  
攷之行度密於太初是新元効於今日者也光晃以陰

陽不和盜賊之興皆元之咎誠虛妄造勘劾之四分歷  
僅七十餘年而已謬蓋建歷元初專泥三百年斗建改  
憲之文是以斗分太多揆諸月行遂踈闊較之天度出  
三百年而餘一日積世不誤劉洪何承天能指言其失  
則踈太甚此東都四分歷也以上東漢志永光中宗紺  
上書正月十六日月當食而四分歷以二月詔行紺法  
熹平三年二十九年之中月先歷食者十六事於是差  
矣洪作七曜術時孫誠言繼法當改洪奏宜用誠術遂

用洪等施行誠術晉志曰靈帝光和中洪考古今歷法  
言其進退之行知四分歷疎闊更以五百八十九為紀  
法一百四十五分為斗分而造乾象歷冬至日在斗二  
十二度以術追日月五星之行依易立數名為乾象歷  
又制日行月行黃道赤道之度法轉精密矣獻帝建安  
中鄭玄受其法又加注釋焉自黃初後改歷者皆斟酌  
乾象洪術遂為後代推步之表此劉洪乾象歷也 宋何  
承天曰四分於天出三百年而盈一日積世不誤劉歆

三統又踈濶方於四分六千餘年又益一日揚雄心惑其說未為六元班固謂之最密著于漢志

魏文帝黃初中高堂隆議歷數改革韓翊以為乾象減斗分太過後當先天造黃初歷以四千八百八十三為統法千二百五為斗分其後陳羣奏翊首建恐不審故以乾象互相參校更相是非無時而決徐岳議劉洪以歷後天加太初元十二紀減十斗下分元起己丑實精密可長行今翊所造皆用洪法小益斗下分所錯無幾

岳課日月蝕五事乾象四遠黃初一近翊術自疎又楊偉言韓翊據劉洪之術知貴其術而棄其論至明帝景初元年楊偉改造景初歷欲以大呂之月為歲首建子之月為歷初遂以建丑之月為正改其年三月為孟夏三年正月復用夏正

晉姜岌曰古歷斗分強不可施於

今乾象斗分細不可通於古景初雖得其中而日之所  
在乃差四度合朔于盈皆不及其次唐一行曰韓翊楊偉更造新術而皆依讖緯三百歲改憲之文攷經之合



朔多中校傳之南至則否說齊曰朔創於前偉繼於後  
咸遵劉洪之議未及洪之深妙蓋二歷皆寓于模毋終  
不過洪之術也蜀仍漢四分歷吳王蕃以劉洪術制儀  
象及論故吳用乾象歷此魏黃初景初歷也

晉武帝因魏之景初歷改名泰始歷自泰始十年上元  
甲子朔夜半冬至日月五星始于星紀為正歷杜預又  
著春秋長歷及論武帝咸寧中李脩卜顯依預論為術  
名乾度歷表上之時尚書史官以乾度與泰始參校古

今注記乾度歷殊勝泰始歷上勝官歷四十五事今其  
術具存元帝渡江更以乾象五星法代楊偉歷穆帝永  
初八年正朔造通歷以甲子為上元

說齊曰因其上元

為開陽之始其說畧見於晉史其私不用於日官莫可

考也

其后武帝太元中姜岌造三紀甲子元歷其畧曰

治歷之道必審日月之行然後可以上考天時下察地  
紀一失其本四時變移自羲皇暨漢魏各自制歷以求  
厥中考其疏密惟交會薄蝕可以驗之然書契所紀惟

春秋著日食之變凡三十六其朔晦不知用何歷班固  
以為春秋用魯歷歷不正閏失其序魯以閏餘一之歲  
為郅首春秋置閏不與此郅相符合歷序曰孔子為春  
秋之故退脩商之故歷故其數事傳於後世則是春秋  
用商歷並晉志 晉之歷有五曰泰始曰乾度曰乾象  
曰通歷曰三紀甲子然終晉之世止用泰始而餘歷不  
果施行

南朝宋武帝永初元年改泰始歷為永初歷文帝元嘉

二十二年何承天撰元嘉新歷刻漏改二十五箭以日食之衝知日所在又以中星驗之知堯時冬至日須女十度今在斗十七度又測景以校二至差三百有餘知今之南至日應在斗十三度於是更立新法冬至徙上三日五時日之所在移四度又有遲疾前歷合朔月食不在朔望今晉以盈縮定其小餘以正朔望之日詔付外詳之太史令錢樂之等奏皆如承天所上推月頻三大頻二小此舊法殊為乖異謂宜仍舊詔可又元嘉十

四年河西王牧犍遣使獻河西趙歐所換甲寅元歷通

鑑

自宋迄齊相仍用元嘉歷梁武初興因循齊舊天監

中因祖常進甲子元歷令太史候新舊二歷氣朔交會

及七曜行度新歷密舊歷疎乃更用祖常所造甲子元

歷又名大明歷至大同十年詔太史虞氏更造新歷以

甲子為元未及施用而遭侯景之亂陳氏亦用祖仲之

歷隋志南朝之歷曰永初曰元嘉曰甲寅元曰甲子

元曰大同新歷然甲寅元大同二歷不用永初歷又復

因晉四朝所用者元嘉甲子元二歷而已

北朝元魏大武時崔浩上表言自秦燔書而漢以來妄造歷術者十餘家皆不得天道之正大誤四千小誤甚多不可言盡宜改誤歷術若以從天遊曰五寅元歷其後浩以國書之禍坐誅終魏之世惟用元始正光二歷而五寅元不果行也

浩傳

初魏入中原但得景初歷世

祖克沮渠氏得趙歐元始歷時人以為密高宗興安元年始行之世宗以元始歷寢疎命更造新歷至肅宗正

光中崔光取張龍翔等九家所上歷候驗得失合為一

歷以壬子為元應魏之水德命曰正光歷

宏詞篇

又有

信都芳因祖常之法私撰靈憲歷筭月頻大頻小食必有朔證據甚明每云何承天亦用此法而不能精靈憲若成百代無異議者書未成而卒其法亦莫考也及東魏興和元年以正元歷浸差命李業興更加脩正以甲子為元號曰興光歷西魏入關尚行興光歷法

北齊顯祖天保元年命宋景業造天保歷行之而重峻

鄭元偉立議非之又與劉孝孫張孟賓二人同上甲寅元歷後周明帝武定元年始造周歷於是胡克遜庾李才及諸日者採祖常舊議通簡南北之術然周齊並時而歷差一日頗覩其繆故正光廢而天和作矣天和歷上於甄鸞其後大象年間太史馬顯等上景德元歷即行之時隋高祖輔周欲以符命曜天下道士張賓知上意乃自言星歷有代謝之證乃更造新歷

又名己巳元

歷何承天法微加增損行於開皇之四年賓歷既行劉



孝孫劉焯並稱其失所駁六條十七年張胃元論曰日影短長羣臣咸以胃元為密乃行胃元所造歷劉焯增修其書名曰皇極歷又名甲子元更有增損迄于義寧並隋志 北朝之歷曰五寅元曰元始曰正光曰靈憲改元魏之歷也曰興光曰天保曰甲寅元此東魏高齊之歷也曰天和曰景寅元曰己巳元曰皇極此後周隋氏之歷也言歷者不一行之數十年輒復差繆故南朝之歷則以何承天為宗而北朝則依趙歐祖冲之以為

據此南北歷之大旨也

唐志曰唐終始二百九十餘年而歷八改初曰戊寅元  
歷蓋高祖時傅仁均所造也用於武德之二年閱明年而  
月蝕比不驗明年詔祖孝孫等考定乃畧去其尤疏闊  
者其後崔善與李淳風復更定其數十條淳風又言仁  
均減除稍多定朔遂差二刻其二曰麟德甲子元歷高  
宗時李淳風作也戊寅歷推步既踈淳風乃增損劉焯  
皇極歷作是歷古歷有章部紀元有日分度參差不齊

淳風為總法千三百四十以一之損益中晷術以考日  
至為本渾圖以測黃道當時以為密與太史令瞿曇羅  
所上經緯歷參行其三曰開元大衍歷僧一行所作也  
開元九年麟德歷書日蝕比不效詔一行作新歷推大  
衍數立術以應之較經史所書氣朔日名宿度可考者  
皆合本志曰自太初至麟德歷有二十三家與天雖近  
而未密也至一行密矣其倚數立法固無以易也後世  
雖有作者皆依放而已竊考其詳本於天地之二中始

於冬至之中氣以晦朔定日月之會以日度正周天之數以卦氣定七十二候以中星正二十四氣其原皆出於易自春秋以來至開元十二年變更凡二十一事戊寅歷得十六麟德歷得二十三而開元得二十四用此例以校古今之薄蝕五星之變差而開元歷課皆第一然開元十二年七月朔十三年十二月朔於歷當蝕而皆不蝕杜預有云日月動物雖行度有大量不能不小有盈縮故有雖交會而不蝕者或有頻交而食者是也

若因開元二蝕曲變交限而從則差者益多矣肅宗時  
山人韓穎言大衍或誤穎乃增損其術更名曰至德歷  
其四曰寶應五紀歷司天郭獻之等所上也代宗以至  
德歷不與天合詔獻之等復用麟德元紀更立歲差增  
損遲疾交會及五星差數以寫大衍舊術上元七曜起  
赤道虛四度帝為製序題曰五紀歷其與大衍小異者  
九事而已其五曰建中正元歷司天徐承嗣所上也德  
宗時五紀歷氣朔加時稍後天推測星度與大衍差率

頗異徐承嗣等雜麟德大衍之旨治新歷上元七曜赤道虛四度建中四年歷成名曰正元其氣朔發歛日躔月離晷漏交會悉如五紀法其六曰元和觀象歷司天徐昂所上也憲宗元和二年用之然無章蔀之數至於察歛啓閉之候循用舊法測驗不合其七曰長慶宣明歷穆宗即位以為累世纘緒必更歷紀乃詔日官改撰歷術名曰宣明上言七曜起赤道虛九度其氣朔發歛日躔月離皆因大衍舊術晷漏交會則稍增損之更立

新度以步五星其八曰景福崇元歷邊岡所造也昭宗時宣明歷施行已久數亦漸差邊岡算改治新歷岡用算巧能馳騁反復于乘除間雖籌策便易而冥於本原用唐志修一行歷議曰易天數五地數五五位相得各

有合所以神變化而行鬼神也天數始於一地數始於二合二始以位剛柔天數終於九地數終於十合二終以紀閏餘天數中於五地數中於六合二中以通律歷天有五音所以司辰也地有六律所以司辰也參伍相

周究於六十聖人以此見天地之心也自五以降為五行生數自六以往為五材成數五十為大衍之母著數之變九六皆一乾坤之象也七八各三十六子之象也故爻數通六十是為天地之樞如環之無端蓋律歷之大紀也

五代初用唐崇元歷而晉高祖時馬重績始更造新歷不復推古上元甲子冬至七曜之會而起唐天寶十四載乙未為上元用正月雨水為氣首初唐建中時術者



曹士薦始變古法以顯慶五年為上元雨水為歲首號符天歷然世謂之小歷祇行於民間而重績乃用以為法遂施于朝廷賜號調元律行之五年輒差而復崇元歷周廣順中博士王處訥私撰明元歷于家民間又有萬分歷而蜀有永昌歷正象歷南唐有齊政歷五代之時大畧如此而調元歷法既非古明元又藏其家萬分止行民間其法既不足紀而永昌正象齊政歷皆止用於其國今亦亡矣周世宗內修法度王朴通於歷數乃

詔朴撰歲餘朴奏曰自唐季以來亂日失天陛下考古  
道舉隆典敢不奉詔乃包萬象以為法齊七政以立元  
測圭箭以候氣審朧朧以定朔明九道以步月按疾遲  
以推星考黃道之邪正辨天勢之昇降而交蝕詳焉乃  
以一篇步日一篇步月一篇步星以卦氣滅沒為下篇  
都四篇

歷經一卷歷十一卷顯德三年七政細行歷一

卷為欽天歷世宗嘉之詔司天監用之以明年朔旦為始  
顯德欽天歷行自前諸歷並廢用

五代歷修王朴歷成

王處訥謂之曰此歷可且行久則差矣既而果然宋興乃命處訥正之

國朝隆興二年以王朴欽天歷時刻差繆命有司重加研覈四年王處訥上新歷號應天歷此國朝歷法之始也太平興國中以應天歷置閏有差誤詔吳昭素等各造新歷而昭素歷頗精密賜號乾元此歷之一變也其後朔望有差真宗咸平四年史序王熙元獻新歷更名儀天此歷之再變也始熙元等上儀天歷趙昭逸請覆

之而不從後二歲而歷果差昭逸言其熒惑度數稍繆  
復推驗之果如其說後以星躔差仁宗天聖中司天監  
復上新歷賜名崇天晏殊為序此歷之三變也英宗初  
司天言崇天歷五星之行及諸氣節有差又以日蝕差  
詔周琮等各造新歷以范鎮詳定惟琮歷最密乃用之  
號明天歷此歷之四變也初右道言琮歷不可用至神  
宗熙寧中月食東方與歷不叶詔歷官雜候時有言衛  
朴通歷法召朴至朴言其失在置元不當詔朴改造朴

以已學為之視明天歷朔減二刻歷成行之沈恬上之  
號奉天歷此歷之五變也九年奉天以日蝕不當詔集  
歷家考驗其後有司言奉天有後天之差有詔改造歷  
哲宗元祐六年歷成詔以觀天為名此歷之六變也徽  
宗崇寧三年命姚虞輔造歷名曰占天此歷之七變也  
未幾而蔡京令虞輔更造用帝受命之年即位之日元  
用庚辰日起已卯歷成而名以紀元此歷之八變也紀  
元立朔既差定臘亦舛日食不驗高宗建炎三年乃改

造統元歷元用甲子日起甲子蓋自古造歷多起朔旦  
甲子夜半冬至懲虞輔用受命年月日之失也此歷之  
九變也壽皇以統元日食有差於是改造乾道歷又改

淳熙歷

以四朝志及會要修

主上踐祚歷號曰會元

章蔀紀元攝提遷次黃龍移辰謂之歲歲首至也月首  
朔也至朔同日謂之章同在日首謂之蔀蔀終六旬謂  
之紀歲朔又復謂之元是故日以實之月以閏之時以  
分之歲以周之章以明之蔀以部之紀以記之元以原

之極建于中道營于外

東漢志

總論歐陽公曰歷起於數數者自然之用其用無窮而無所不通以之於律於易皆可合也

太初以律起數大

衍以易起數

然其要在於候天地氣以知四時寒暑而

仰察天日月星之行運以相參合而已然四時寒暑無形而運於下天日月星有形而見於上二者常動而不息一有一無出入升降或遲或疾不相為謀其久而不能無差失者勢使之然也故為歷者其始未嘗不精密

其後多踈而不合亦理之然也不合則屢變其法以求之自堯舜三代以來歷未嘗同也吾嘗因是而觀諸易矣革之象曰澤中有火革君子以治歷明時天下之事可革者多矣而聖人必以歷言者蓋事之在天下最易差者莫如歷而不可不修者莫如歷

四朝志曰自古帝王必先考正歷象蓋將以前民用授人時也然以聖人之智其於天地之理陰陽五行之運日月星辰之紀考驗推測無有不盡其至立法倚數固



宜歷萬世而不忒徃徃傳之稍久其應輒差何哉天地之數其妙而不可測者常在於眇忽毫釐之際而其象與氣推移贏縮亦有時而不齊故雖聖智不能盡窮積以歲月則歷之不能無差理固然也聖人不能使歷之無差嘗因其差而正之而歷家者流徃徃各持其說以相矛盾主其議者又從而以私意輕重之漢唐以來歷之所以數變而無一定之說亦有由矣大抵漢歷五變而太初最密唐歷八改而大衍最密宋朝初用欽天歷

至太平興國中始更定歷名曰乾元至咸平復改曰儀  
天天聖曰崇天嘉祐曰明天熙寧曰奉元元祐曰觀天  
崇寧曰占天後復改曰紀元蓋自乾元以至紀元凡八  
變法雖不同至於前民用授人時其歸則一矣

辨歲差自漢改歷之初洛下閎謂八百年後當差一度  
然當時史官考諸中星知太初歷已差五度而閎不之  
察蓋古之為歷未知有歲差之法其論冬至日月躔之  
宿一定不移而不知今歲之日躔在冬至者視去歲冬

至之日經常有不及之分至晉虞喜始覺其差遂立歲差之法以五十年日退一度然失之太過宋何承天倍增其數以百年退一度又反不及至隋劉焯取二家中數以七十五年退一度較之二家之歷雖為差近亦未甚密故唐一行復以大衍之法推之乃得八十三年而差一度自唐以來歷家皆宗其法迄于今日又不若統天歷之為漸密也大衍立法謂日躔于一歲之間行周天度未徧餘分而日已至焉每歲若有不及之分故一

度為三千四十分其所差之分一歲三十有六又積而至於八十三年則差一度矣然猶未也考古驗今其實七十九年而退一度是故堯時之日月在虛一度自是而降漸退在女又過在斗自牽牛而退在斗二十六歷斗二十五迤邐而退則在建星矣知歲差之法則知古今之中星不同可坐而判或者不知歲差之法每以堯典校之月令至於今日不啻差一次矣求其說而未得遂謂節氣有初中之殊又謂古以午為中今以未為中

是皆自欺之說固不足信蓋嘗考諸經史自堯以來至于宋朝冬至日躔各自不同然後知歲差之法固不可廢大衍歷推帝堯續紀之端日在虛一度則鳥火虛昴皆以仲月昏中合於堯典考諸堯時日之所在冬至在虛一度夏至在柳十四度春分在胃十二度秋分在氏十度至唐開元大衍歷冬至日在斗十度夏至在井十六度春分在奎七度秋分在軫十四度今之統元歷冬至在斗二度夏至在井十八度春分在奎初度秋分在

軫七度自冬至之日黃道至斗為極南黃道極南之所  
出辰入申故日亦出辰入申又漸退而北行至於春分  
正當黃赤道之交出卯入酉故日亦出卯入酉進而至  
夏至黃道至井而極北黃道極北之所出寅入戌故日  
亦出寅入戌自夏至後日漸退而至於秋分復當黃赤  
道之交出卯入酉故日亦出卯入酉又退而至於冬至  
復如初極之於南矣日之出入也北而復南南而復北  
者黃道之勢使然也故太元經曰日一北而萬物生一

南而萬物死正謂是矣月之行天也循黃道內外而東黃道內曰陽歷外曰陰歷與黃道赤道相去最遠者二十四度月道與黃道相去最遠者六度日行黃道月行九道青道二出黃道東朱道二出黃道南白道二出黃道西黑道二出黃道北其交必由於黃道而出入故兼言為九道也然此特言其大槩爾至五代王朴乃以黃道一周分為九節一節之中分為九道盡七十二道而斜正之勢無所隱遯明月之行道備於此矣日之行也

舒月之行也速當其同度謂之合朔舒速先後近一遠  
三謂之弦相與為衡分天之中謂之望以速及舒光盡  
體伏謂之晦其循黃道左右而進也春分弦以東井亦  
猶日之夏至而極北也秋分弦於南斗亦猶日之冬至  
而極南也然不可與日同測景者以月有入陰陽歷之  
差也故周官有冬夏致日春秋致月者此也至五星之  
行其出入夫陰陽之歷大畧與日月不異然其伏見遲  
留進退前後又各不同當以五緯推步法求之可也

渾



儀畧說

裴胄之問董生曰日常右轉星常左轉大凡不  
滿三萬年日行周二十八舍三百六十五度然必有差  
約八十年差一度自漢文帝三年甲子冬至日在斗二  
十二度至唐興元元年甲子冬至日在斗九度九百六  
十一年差十三度矣

唐李肇國史補

疑難西漢之歷莫善於太初東漢之歷莫善於四分由  
魏至隋莫善於皇極在唐則大衍為善在五代則欽天  
為善然其立法各有不同太初以八十一為日法四分

則用節月九百四十皇極則用一千二百四十二大衍  
則用二千四十欽天則用七千二百其多寡之異何耶  
太初以三百八十五為斗分四分則用章法十九皇極  
則用萬二千一十有六大衍又以七百七十九為虛分  
欽天則一千八百八十四其增損又如此之異何耶泰  
初諸歷則日為一法度為一法至大衍又合日度為一  
法太初諸歷則餘分置於斗分至大衍則餘分置於虛  
分此又何耶太初之歷本於鍾律以八十一分為統母

其數起於黃鍾之龠而終漢之歷號為最詳開元之歷  
求乎大衍以四十九分為筭而終唐之世號為最密是  
非所祖之多門而為數則同也黃帝造歷元起辛卯高  
陽氏起乙卯虞舜用戊午夏商周以三統改正朔是非  
立元之多門為數則同也漢靈帝時劉洪作乾象歷以  
五百八十九為紀四百四十五為斗分魏文帝時韓翊  
造黃初歷以四千八百八十三為紀法千二百五為斗  
分漢之歷或八十一為法魯之歷或以九百四十為筭

是非倚數之多門而為數則一也若夫孝昭清臺之候  
課諸歷法號為得宜而張壽王書乃以陰陽不調為更  
歷之過章帝元和之詔用四分歷其法頗密而馮光陳  
晃之論乃以為不合於圖讖此皆不經之言也

羣書考索卷五十四

欽定四庫全書

羣書考索卷五十五

宋 章如愚 撰

歷數門

歷類

古今歷名調歷

黃帝

顓帝歷虞歷夏歷殷歷周歷

魯歷

以上歷謂之古歷皆以四分起數若同六歷

則不數虞歷

太初歷

西漢武帝時鄧平所作

三統

歷

西漢末劉歆推說此歷

四分歷

本古歷法東漢

以太初疏閭章帝元和間用之

乾象歷

東漢靈帝

時劉洪作

黃初歷

曹魏文帝初韓翊作

景初歷

曹魏

明帝時楊偉作

泰始歷

即景帝初歷晉武帝改此名

正歷

西晉武帝時劉智作

春秋長歷

杜預作

乾度歷

西晉初年李脩王顯用杜預歷論作

通歷

東晉穆

帝時王朔之作

三紀甲子元歷

姚秦姜岌作

七曜

歷

宋何承天表言徐廣有此歷不知作者

元嘉歷

宋文帝時何承天作

大明歷

宋孝武時祖冲之作

梁歷

武帝大同中命虞劇作趙歐歷涼太史趙歐作正

光歷

北魏孝明宗時崔光合九家歷作興和歷東魏孝

靜帝命李業興更修正光歷

天保歷

北齊文宣帝初宋

景業作

甲寅元歷

北齊董復鄭元偉作

劉孝孫歷

北齊

後主時

張孟賓歷

北齊後主時

明克讓歷

北周明帝時

天和歷

北齊武帝時甄鸞作

丙寅元歷

北周靜帝時馬

顯作

張賓歷

隋文帝開皇初

張胃元歷

隋開皇十七年

皇極歷

隋劉焯作

戊寅元歷

唐高祖初傳仁均作

麟德

甲子元歷

唐高祖時李淳風作

經緯歷

唐高宗時瞿曇

羅上光宅歷

武后命瞿曇羅作

乙巳元歷

中宗時南宮

說作

開元大衍歷

玄宗時僧一行作

九執歷

來自西域

至德歷

肅宗時韓穎作

寶應五紀歷

代宗詔郭獻之作

建中正元歷

德宗時徐承嗣楊景風作

元和觀象歷

憲

宗時徐昂上長慶宣明歷

穆宗初詔日官作

景初崇玄

歷昭宗時邊岡等作

符天歷

唐建中時曹士薦作

調元

歷石晉時馮重績作

明玄歷

五代周太祖時王延訥作



萬分歷

五代時民間有此歷

永昌歷

前蜀王建時胡秀

林作

正象歷

亦蜀人作

齊政歷

南唐時陳咸勳作

顯德

欽天歷

五代至周世宗時王朴作

以上五十七歷

立元黃帝調歷

辛卯

顓帝

乙卯

虞

丙午

夏

丙寅

殷

甲寅

周

丁巳魯庚子

太初

丁丑

三統

庚戌

四分

庚申

乾象

丑景初士辰

以上十二歷立元各不同必始以甲子

正朔之通歷 自此歷始以甲子為上元 祖冲之大明歷

自此歷始立論以為作歷上元必當以甲子 曹士薦符

天歷 此歷始不立上元而以近出唐顯宗五年庚申起

起數古之七歷皆以十九歲為一章有七閏積章月二百三十五

一歲凡三百六十五日四分十之一 是名月分

一月凡二十九日九百四十分日之四百九十九

太初歷始變古法以八十一為日法以一千五百三十

九為統法

一歲凡三百六十五日一千五百三十九分日之三  
百八十五

一月凡二十九日八十一分日之四十三

其一歲餘則增四分法多六千一百五十六分日之  
一故積六千一百五十六年則增多四分之法之一  
日

然猶以十九歲為一章

東漢四分歷即古歷耳 乾象歷始減斗分 以五百八十九為紀法百四十五為斗分 亦猶以十九歲為一章

大明歷始破章法 不復以十九歲為一章

乃以三百九十一歲為一章有一百四十四閏積章月四千八百三十六 雖斗分章法盡變古法併日法度法兩者並立則猶無異於古也 日法者約朔周之法 度法者約歲周之法

麟德甲子元歷至此歷始併日法度法為一而立總法

總去一千三百四十

一歲三百六十五日一千三百四十分日之三百三十八

一月二十九日一千三百四十分日之七百十一

施用久近黃帝至周凡二千四百一十四年而歷止七

改黃帝顓帝虞夏殷周魯

漢四百年而歷始改

初用

顓帝武帝用太初章帝用四分

景初一歷自曹魏明

帝始盡魏涉兩晉至宋文帝元嘉二十二年始改凡用

二百八十年 元嘉歷用於宋涉齊至梁凡六十五年

大明歷用於梁終梁訖陳凡八十年 唐始終二百九

十餘年而歷九改 唐志序云八改及考志中乃凡九改

戊寅元 麟德甲子元 脫元大衍 至德 寶應

五紀 建中正元 元和觀象 長慶宣明 景初

崇玄

宋朝方二百六十餘年而歷十餘改

應天 乾天 儀天 崇天 明天 奉天 觀天  
占天 紀元 統元 乾道 淳熙 會元 統天  
大抵古歷用之久後世之歷改之頻

因襲三統襲太初 四分襲古歷一黃初景初俱襲

乾象一張賓依何承天法 張胃元歷竊劉焯術 戊

寅元歷祖術張胃元稍以劉孝孫術參之 麟德歷因

劉焯皇極法增損所宜 寶應五紀歷用麟德元紀為

大衍舊術 建中正元歷以後三四歷皆因大衍舊術

調元歷用符天法立元用宣明法推氣朔用崇元法  
推五星

創改乾象始創月行遲疾法 黃初始課日蝕 景初  
始有交蝕起虧術 元嘉始改斗分為室分 大明  
又改室分為虛分始立歲差法 馬顯丙寅元歷始推  
交蝕定小餘 張胃元始立五星入氣加減法始立日  
應食不食術 皇極始有推黃道月道術 大衍始立  
步中朔術始以九服遠近推執漏交會創立歲星差合



術 崇玄始立相減相乘法以求黃道月道 欽天始  
變五星法令遲疾留行舒亟有漸

精密太初上元日月如合璧五星如連珠

清臺課校太

初第一

乾象方於前法轉為精密鄭玄徐岳並解釋之

自黃初以後改作歷術皆斟酌乾象所減斗分朔餘  
月行疾徐以求折衷洪術為後代推步之師表

大明歷本宋祖冲之所作宋不及用至梁武帝天監中  
冲之子祖常上其父術詔與元嘉歷參校起八年十一

月訖九年七月冲之歷皆密元嘉歷皆疎

張胃元歷與古不同者三超古獨異者七 皇極歷術士或稱其妙 麟德歷當時以為密 大衍歷較經史所書氣朔日名宿度可考者皆合

因南宮說陳元景等言其九執術詔李麟等較靈臺候簿大衍十得七八麟得纔三四九執一二焉自太初至麟德歷有二三十家與天雖近而未密也至一行密矣其倚數立法固無以易也後世雖有改作者

皆依倣而已

宣明歷自大衍歷後法制簡易合望審近尤能出其右者

自譽楊偉作景初歷上表云雖使研桑心筭隸首運籌重黎司晷羲和察景以考天路步驗日月究極精微盡術數之極皆未能並臣如此之妙也

姜岌作三紀甲子元歷其畧云圖讖皆云三百歲斗歷改憲今治新歷上可以考合於春秋下可以取驗於

今世此法乃可千歲用之豈三百年歷改憲者乎

馬顯作丙寅元歷上表云謹案史曹舊簿及諸家法數  
棄短取長共定今術兩曜虧食五星伏見參校積時  
最為精密

劉焯作皇極歷自言於皇太子曰願循記注自許精微  
秦漢以來无所與讓尋聖人之迹悟曩哲之心則七  
曜之行得三光之度正諸氣朔成一歷象會通今古  
符元經傳稽於庶類信而有徵

王朴作欽天歷奏云包萬象以為法齊七政以立元測土箭以候氣審朧胸以定朔明九道以步月校遲疾以推星考黃道之斜正辨天勢之升降而交食詳焉

陳舛顓帝歷漢初用之朔晦月見弦望滿虧多非是三統歷方於四分六千餘年輒益一日何承天以為歆幾乎不知而妄言者杜預考古今歷以驗春秋知三統之最疎四分歷施用至魏日蝕率常在晦乾象法魏太史令許攸云劉洪月行術用以來且四十餘年以後

覺失一辰有奇 韓翊以為乾象減斗分太過後當先  
失 景初歷晉改名泰始而用之其推五星尤疎闊晉  
元帝更以乾象五星法代之 姜岌云殷歷斗分麓故  
不可施於今乾象斗分細故不可通於古景初斗分雖  
在麓細之中而日之所在乃差四度宋何承天云景初  
二至差三日五時 元嘉歷既施用祖冲之上表云日  
月所在覺差三度二至晷影幾失一日五星伏見至差  
四旬 梁時與祖冲之參校元嘉歷疎 張賓歷既行

劉孝孫劉焯並稱其失凡六條如冬至日守常度五星  
不同元等事 丙寅元歷劉焯以為日躔莫辨緩急月  
離妄為兩種月道交會去極晷漏立術之疎不可紀極  
隨事糾駁凡五百三十六條 戊寅元歷施行至武德  
三年正月望二月八日朔當蝕比不効 麟德歷施行  
至開元九年曾署日蝕比不効 至德歷施行至寶應  
元年六月望戊夜月蝕三之一至德加時在日出後有  
交不署蝕不與天合 五紀歷施行至德宗時五紀歷

氣朔加時稍後 觀象歷測驗不合 宣明歷施行至

昭宗時數亦漸差 調元歷行之五年輒差不可用

舍而復用四分

西漢初用顓帝歷即四分法武帝改太

初 東漢章帝復用四分

崇玄

唐昭宗時始用崇玄

至石晉高祖始用調元行之輒差不可用而後用崇玄

二歷參用東漢用四分後以劉洪月行術參之 西晉

用泰始至東晉元帝以乾象五星法參之 唐高宗用

麟德歷以瞿曇羅經緯歷參之



歷家爭辨太初西漢既用太初二十七年至元鳳三年  
太史令張壽王執古調歷與之爭詔課清臺太初歷第  
一壽王課比下有司劾壽王所執乃殷歷非調歷又壽  
王改易黃帝以來帝王世代竟以下吏自太初歷初起  
至元鳳六年而是非堅定

四分東漢既用四分至安帝延光中謁者亶誦言當用  
甲寅元順帝漢安中邊韶言當復用太初歷靈帝熹平  
中馮光陳晁復議四分五元之非欲用甲寅為元每有

異論輒集衆議尚書令忠稱甲寅之失於先太史用虞恭辨太初之非於中議郎蔡邕斷四分之是於後是以終東漢一代四分不易

元嘉何承天上新歷宋文帝詔付外詳之太史令錢樂之等奏皆如承天所上唯月有頻數比月法乖異請宜仍舊詔可

大明祖冲之表上新歷宋孝武帝下之有司使內外博議時人少解歷數竟无異同之辨唯太子旅賁中郎將

戴法興立議六條其改立章法一議其歲日度歲差一  
議其歷元甲子一議其七曜同元一議其改移辰次一  
議其遲疾陰陽異率一議冲之隨辨析之各有條理時  
法興方有權寵議者皆附之唯中書舍人巢尚之是冲  
之之術

天保北齊用宋景業天保歷至後主時董峻鄭元偉皆  
立議非之遂上甲寅元歷又有廣平人劉孝孫張孟賓  
名為歷術趙通嚴又更盈縮爭論未定遂國亡

張賓歷賓歷既行劉孝孫劉焯並稱其失凡六條遂上  
孝孫歷法時賓有寵劉暉附會之共短孝孫等斥罷之  
後賓死孝孫訟其事帝令與賓歷參校

張胃元歷張胃元亦短賓歷異論鋒起久之不定帝令  
參考日食事楊素等奏賓歷无驗胃元孝孫所尅皆中  
帝於是引見孝孫等勞徠之孝孫請先斬劉暉乃可定  
歷帝不懌而罷

皇極歷及孝孫卒楊素牛弘復薦胃元帝召見因言曰

長景短之事帝大悅令定新術劉焯聞胄元進用又增損孝孫歷法更名七曜新術以奏之袁充與胄元害之焯又罷至開皇十七年胄元歷成劉暉與國子助教王頗等執舊術與司歷劉宜援據古史駁難胄元言合朔晷影月見虧蝕等事胄元不能盡下迭相駁雜不決會通事舍人顏敏楚上書云漢改太初言後八百年當有聖人改之今七百餘年胄元其是矣帝遂廢退劉暉等而施用胄元歷開皇二十年帝命皇太子召歷算之

士集東宮議歷事劉焯復增修其書名曰皇極歷太子嘉之未獲考驗以官不滿意稱疾歸至仁壽四年焯言胄元之失於皇太子以為胄元之歷實竊焯歷前本遂糾駁其失凡五百三十六條胄元復難劉焯以為既定朔不應復有歲月平率若值三小猶減三五為十四值三大猶增三五為十六皆非三五之正互難不決焯又罷歸煬帝大業四年太史奏日食無效帝召焯欲行其歷袁充方幸於帝左右胄元共排焯歷又會焯死歷竟

不行 戊寅元唐高祖既用戊寅元歷至太宗貞觀初  
李淳風疏論十八事詔崔善為課之其七條改從淳風  
麟德貞觀十四年太宗將親祀南郊戊寅元歷以十  
月癸亥朔甲子冬至而李淳風新術以甲子合朔冬至  
國子祭酒孔穎達等議請從淳風十八年淳風又上言  
仁均歷有三大二小云日月之蝕必在朔望十九年九  
月後四朔頻大詔集諸解歷者詳之不能定庚子詔用  
仁均平朔

大衍一行作大衍歷善算瞿曇羅誤者怨不得與改歷事開元二十一年與陳元景奏大衍寫九執歷其術未盡南宮說亦非之詔侍御史李麟等較靈臺候簿大衍十得七八九執纔一二乃罪說等而是否決

傳會太初本於律 三統說易春秋 四分之元在圖識

通歷以上元為開闢之始天保用圖識三十五數大衍依於易



假歷天保因北齊文宣受禪遂假托圖讖以為握圖元

命包言齊受祿之期當魏終之紀得乘三十五以起數

張賓歷

隋文帝作輒於周張賓揣知其欲受禪之意欲

得進用而主此歷

張胄元歷

表之言日行上道晝長晷短張胄元依附之

戊寅元歷

因唐高祖以戊寅年授禪遂以戊寅為元

乙巳元歷

因唐中宗以乙巳年及位遂以乙巳為元

### 閏餘類

閏易曰歸奇於扚以象閏五歲再閏故再扚而後掛西  
漢志曰黃帝考定星歷正閏餘自三苗亂德重黎之官  
廢而閏餘乖次堯命羲和以閏月定四時成歲周春官  
太史正歲年以序事頒告朔于邦國閏月詔王居門終  
月注云閏所以正中朔也中朔小大之不齊正之以閏

記玉藻天子玄端閏月則闔門左扉立于其中春秋傳  
曰文公閏三月非禮也先王之正時也履端於始舉正  
於中歸餘於終履端於始序則不愆舉正於中民則不

惑歸餘於終事則不悖此聖王之重閏也

杜元凱釋例

自文公十一年三月甲子至襄公二十七年凡七十一年當有二十六閏而長歷推得二十四閏是再失閏襄公哀公事見歷序

襄公二十八年書春無冰說者謂去年覺其失於是頓置兩閏以應天正

去年謂二十七年見前

建子之月無

冰乃書以記災一歲兩閏果是其理乎哀公十二年冬十二月螽季孫問仲尼曰聞之火伏而後蟄者畢

心星

也火伏在今十月今火猶西流司歷過也注云失閏自  
秦用顓帝歷以十月為歲首常以九月為閏自以為得  
歸餘於終之說而不知其非也漢興因之久而不革至  
武帝元封中乃悟其謬更造太初歷校中朔所差以正  
閏分傳曰閏以正時時以作事事以厚生生民之道於  
是乎在則閏可不重乎又曰歷數以閏正天地之中西  
漢晉志杜預曰閏月無中而北斗斜指兩辰之間所以  
異於他月

算閏法竊求之二十八宿循天而左行一日一夜一周  
天周天之外更行一度計一年三百六十五度四分度  
之一也日一日行一度則是一歲一周天也月一日行  
十三度十九分度之七凡二十七日而周天一匝更行  
十九度半餘逐於日與之會以所次之辰故傳曰日月  
相會謂之辰周天之度各分為九百分則歲之變凡有  
三十三萬一千七百分一日九百分一年而餘小盡六  
日得五千四百分又計五百四分度之四凡有四千七

百分并之而為一萬一千七百分以當十一日半弱兩

歲則餘二萬三千四百分以當二十二日半小弱

前刺

一百分跨一日故曰弱此添剩四百分故曰小弱

三歲

則餘二萬四千六百分以當三十四日小強

凡四百五

十分為判此六百政日小強

所以歷家於三年置一閏

用以歸受此三年之餘分也然三年一閏故用二十九日約周天之餘度二萬六千一百分耳尚更剩前二年中八千五百分通後第四年所餘一萬一千七百分而

二萬零二百分以當二十三日半小弱餘四萬分故曰

小弱及五年則三萬一千九百分以當二十四日半強  
改五歲再閏也此三十四日猶有餘分又積歸後年置  
閏若前年且閏之月大餘則後閏大餘分也姚說同禮  
者曰周天三百六十五度四分度之一而一歲凡十二  
月除月之小者而計其餘積三十二月而適得一月之  
數故三年而一閏五年而再閏八年而三閏十年而四  
閏十三年而五閏十六年而六閏十九年而七閏

大衍歸奇以象閏說大衍之數五十說曰天一地二合而為五位每位各行為十故曰大衍其用四十有九說曰虛其一以象太極分而為二以象兩說曰兩者天地也掛一以象三說曰掛者以著歸小指間三者人也人與天地為三揲之以四以象四時說曰揲者數也四時春夏秋冬也歸奇於扚以象閏五歲再閏故再扚而後掛說曰奇者四揲之餘也或一或二或三或四扚指間也先揲左以其奇歸於中指无名指之間一



扐也次揲右以其奇歸于中指食指間再扐也五歲再閏者一變之中自有五節掛焉為一節揲左為二節歸左之奇於扐為三節後復以所餘之蓍合而為一焉第二變再分再掛再揲也不言分二不言揲四而獨言掛一者明第二變不可不掛也 古註

係辭皆韓康伯註惟此

章之註其首云王弼曰日用時當記

王弼曰演天地之數所賴者五十也其用四十有九則其一不用也不用而用以之通非數而數以之成則易

之太極也四十有九數之極也夫无不可以无明必因於有故常於有物之極而必明其所由之宗也奇說於四揲之餘不足復揲也分而為二既揲之餘合掛於一故曰再扚而後掛凡閏者十九年七閏為一章五歲再閏者二故畧舉其凡也 易曰大衍之數五十其用四十有九歸奇於扚以象閏五歲再閏故再扚而後掛前志曰元始有象一也春秋二也三統三也四時四也合而為十成五體以五乘十大衍之數也而道據其一其

餘四十九所當用也故著以為數曰象兩兩之又以象

三三之又以象四四之又歸奇象閏十九

歲有陶分滿

十九則為閏也

及所據一加之因以再扞兩之是為月

法之實如日法得一則一月之日數也而三辰之會交  
矣至五位乘會數而朔旦冬至是為章月四分月法為  
周至是乘月法以其一乘章月是為中法參分閏法為  
周至官乘月法減中法而約之則六扞之數為一月之  
閏其餘七分此中朔相求之法也

閏惟正時尚書正義周天三百六十五度四分度之一而日行一度則一朞三百五十五日四分度之一六歷諸緯與周髀皆云日行一度月行十三度十九分度之七為每月二十九日過半日之於法分為日九百四十分日之四百九十九即月有二十九日半強為十二月六大之外有月分三百四十八是除小月無六月又大歲三百六十六日小歲三百五十五日則一歲所餘无十二日全之十三日者當以大率據釐而計之其實一

歲所餘止十一日弱也以為十九年七閏十九年二十  
一月則三百九日其七月四九二分猶二百七日況无  
四大乎為每年十一日弱分明矣所以弱者以四分日  
之一於九百四十分則二分為二百三十五分少於小  
月餘分三百四十八以二百三十五減三百四十八不  
盡一百一十三是四分日之一餘矣皆以五日為率其  
小月雖无歲日殘分所減猶餘一百一十三則實餘尚  
无六日就六日抽一月為九百四十分減其一百一十

三分不盡八百二十七分以不抽者五日并三百六十  
日外之五日為一百其餘九百四十分日之八百二十  
七為每歲之實餘今十九年二十日得整日一百九十  
又以十九乘八百二十七分得一萬五千一百一十三  
以日法九百四十除之得十六日以并一百九十日為  
二百六十日不盡六百七十三分為日餘今為閏月得  
七每月二十九日七日為二百三日又每四百九十九  
分以七乘之得三千四百九十三以日法九百四十分

除之得三日以二百三日亦為二百六日不盡亦六百七十三為日餘亦相當矣所以无閏時不定歲不成若以閏无三年差一月則以正月為二月每月皆差九年差三月即以春為夏若十七年差六月即四時相反時何由定歲何由成乎

至朔同日說按太初歷元自十一月夜半甲子朔旦冬至以牽牛之星居於子為日月初躔之紀積而至於七閏是為一章自一章既至却與紀之之初復以十一月

朔旦冬至是謂至朔同日然其分刻又不能无差故但云至朔同日謂之章是以班固作歷志述孝武造漢太初歷晦朔弦望皆密且以日月如合璧五星如連珠為淵蓋亦其紀元章會無差故也

積餘分置閏說按堯典朞三百有六旬有六日以閏月定四時成歲蓋以周天之度推之此特人事參考上天故以二十八宿分其度及星辰次舍循環一位乃知上天之度有三百六十五度外只四分度之一只此四分



度之一有差乃一歲尅出六日為剩又一歲抽出六月小故得六日揆尅出六日遂一歲合得十二日積三年已得三十六日即置一閏又積至二年後得二十四日揆前閏所剩六日又得三十日足於是再閏所謂三年一閏五年再閏職此之由也閏既成則春夏秋冬四時從而定矣故曰閏以定四時成歲

閏月斗指兩辰間說閏月斗指兩辰間古今之所常驗大槩以閏月無中氣亦非常月所可比而斗之居中央

臨四方分陰陽建四時均五行移節度定諸紀在遷固等史必云皆係於斗者的以斗之所指未嘗有差故也是以月令取昏旦之中星以王弼文必以月建之辰為取信者不無謂也

失閏左傳文元年閏三月非禮也先王之正時也履端於始序則不愆舉正於中民則不惑歸餘於終事則不悖文六年閏月不告朔猶朝於廟傳曰閏月不告朔非禮也閏以正時時以作事事以厚生生民之道於是

乎在不告閏朔是棄時政也何以為民杜預注云四時  
漸差前置閏以正之 穀梁傳云閏者附月之餘分也  
積分而成於月 襄二十七年十一月乙亥朔日有食  
之辰在申司歷過也再失閏矣 襄二十八年春無冰  
杜預注曰前年知其再失閏頓置兩閏以應天正此年  
正月建子得以無冰為災 哀十二年冬十二月螽杜  
預注曰周十二月今十月是歲置閏而失不置雖書十  
二月實今之季月司歷誤一月九月之初尚溫故得有

螽傳季孫問諸仲尼仲尼曰丘聞之火伏而後蟄者畢  
火猶西流司歷過也杜預曰火心星也火伏在辰今十  
月猶西流言未盡沒

詔王居門說禮記外傳云明堂古天子布政之宮在國  
南十里之內七里之外南方陽明之地故謂之明堂太  
廟青陽三者之制同也

即周制

唐虞時為五府

府聚也

合五帝之神而祭之夏謂太廟為世室

言世世不毀

商

人謂路寢為重屋周人謂五府為明堂為其形制同故

再舉其名夏氏一堂之上為五室木室在東北火室在東南金室在西南水室在西北土室在中南陛三階三面九一五室者象天地裁五行生於四時故每室有四達四窓相對一室有八窓象八節

夾室之窓

周人上有

圓屋

即太廟之宣室

今以月令言之則十二室依十二

辰以應其月之令四隅有八室各以左右个言之

个者

隅也各自室不相通也今之東西廟亦以个名中央正

面各當四神之月

正子正卯正午正酉也

通謂之廟東

則青陽太廟西則總章太廟南則明堂太廟北則玄堂  
太廟每室各有垣夏后氏卑其宮室堦崇一尺制則九  
尺矣室中之廣夏時度以步步廣八尺三代不同尺有

長短也商人度以尋尋亦八尺周人度以几几即三尺

堂上度以筵筵即八尺四面各五門三代制不同此以

古尺度之此閏月詔王居門即玉藻云每月就其時之

堂而聽朔焉若閏月則闔門左扉而聽朔於明堂門中  
還處路寢門終月是也周官太史注亦謂門路寢門也

鄭司農云月令分十二月在青陽明堂總章玄堂左右之位惟閏月無所居居于門故於文王在門為閏外傳又云天子五門自外入內第一曰皐門其二庫門其中雉門其四應門極內則路門又云路門即路寢之門然閏月必取寢門為言者蓋閏月聽朔則亦明堂門中還處則路寢終月故也周禮圖云閏非四時之正而四時不得則不正太史必於閏月詔王居門蓋歲月日時固有常矣而置閏則無常無常者變也有常者待是而

後成王於是乎居門以門者一闔一闢而無常利用出入有常者待是而後成也蓋有常以為利無常以為用者天道之自然王之所為凡所以承天而已法於四時春則青陽夏則明堂秋則總章冬則玄堂其居固有常矣而閏月居門凡以明此而已

時令類

時令堯典曰分命羲仲宅暘谷平秩東作以正仲春申命羲叔宅南交平秩南訛以殷仲夏分命和仲宅西昧



谷平秩西成以正仲秋申命和叔宅朔方平在朔易以  
正仲冬夏至仲康義和廢時亂日胤后征之曰先王克  
謹天戒每歲孟春道人以木鐸徇于路惟時義和倂擾  
天紀乃季秋月朔辰弗集于房昏迷天象以干先王之  
誅政典曰先時者殺無赦不及時者殺無赦

夏小正按禮記曰我欲觀商道吾得夏時焉鄭康成記  
曰夏四時之書也其書存者有小正大戴禮有夏小正  
一篇蓋戴德取以為正隋志云夏小正一卷戴德撰詳

矣宋朝紹興初傅崧卿見閔澮所藏戴禮別定一篇列正文於其前而以戴氏傳附之中興館閣書目

呂氏春秋秦呂不韋所作一曰孟春紀其別有四曰本生始生者天地養而擢之謂天子曰重已有五星而反

害之者不達乎性曰貴公聖王治必先公曰去私無私

也其二曰仲春紀其別有四曰貴生耳目口鼻生之役

也害於生則止曰情欲天生人有欲聖人修性以止曰

染絲墨子見素絲而嘆也曰功名由其道功名致其三

曰季春紀其別有四

以下皆有四

曰盡數

聖人察陰陽

之宜辨萬物之利以便生精神安而年壽

曰先已事之

本先治身

曰論人

太上反諸已其次求諸人

曰園道天

負地方聖人以立上下

其四孟夏紀曰勸學曰尊師紀

十聖

神農黃帝顓帝嚳堯舜禹湯文武也

六賢齊桓晉

文秦穆楚莊吳王閭閻越王勾踐

未有不尊師者也曰

誣徒達教之師使弟子得之

曰用衆

假人之長以補其

短

其五曰仲夏紀曰大樂

音生於度量本於太一

曰侈

樂

亂世之樂

曰適音

樂在和在心在適

曰古樂叙自朱襄

以來

炎帝別號也

其臣士達於五弦瑟以來陰氣葛天

氏之樂三人摻斗尾投足以歌八闋

戴氏元鳥逐草木

奮五及叙天常達帝功依地德總萬物之極

樂非一世

之造其六曰季夏紀曰音律

叙十二律之相生三分益

一以上生三分去一以下生

曰音初夏后氏孔甲破斧

之歌始為東音禹為塗山氏反歌始為西音秦穆作為

秦音始為南音有娥氏二女作歌一終始為北音曰制

樂觀王樂於至治曰明理帝王盡於樂也其七曰孟秋

紀曰蕩兵

一作用兵叙古有義兵无偃兵曰振亂世濁

矣有賢主則其義兵矣

曰禁塞

兵苟義則攻守亦可救

守亦可曰懷寵

叙君子中理然後說士當人然後議其

八曰仲秋紀曰論威

義勝之也

曰簡選

兵勢兵器欲便

利角材士民欲精習

曰決勝

兵有本義智勇

曰愛士憐

困窮則國士得矣

其九曰季秋紀曰順民

順民心故功

成曰知士高節守義者曰審已

不察存亡審其所以曰

精通聖人以愛民為心號令未出而天下延頸精通乎

民其十曰孟冬紀曰節喪曰安死曰異寶古人知義所

惡為已所喜此其寶所以異乎俗也曰異用桀紂用其

材亡湯武用其材王其十一曰仲冬紀曰至忠逆耳者

曰忠廉曰當務貴辨曰為論貴信曰遵理貴勇曰行義

貴法曰當務曰長見智相過也其十二曰季冬紀曰士

節當理不避難臨患忘利曰介立以富貴易以貧賤曰

誠廣受於天者曰序意一作廉孝志以身為人重也

漢宣帝時魏相采易陰陽及明堂月令奏之曰東方之神太昊乘震執規司春南方之神炎帝乘離執衡司夏西方之神少昊乘兌執矩司秋北方之神顓帝乘坎執權司冬中央之神黃帝乘坤艮執繩司下土茲五帝所司各有時也東方之卦不可以治西方南方之卦不可以治北方春興兌治則饑秋興震治則華冬興離治則曳夏興坎治則雹明王謹于尊天養人故立義和之官以乘四時授民事高皇帝令群臣議天子所服何昌陵

通等議春夏秋冬天子所服當法天地之數請申謁者  
趙堯舉春李舜舉夏倪湯舉秋貢禹舉冬四人各執一  
時制曰可願陛下選明經通陰陽者四人各主一時時  
至明言所職以和陰陽相傳東漢則太史讀四時令魏  
晉齊宋皆行之唐則讀時令之儀具于開元禮國家因  
仍未暇建明章聖皇帝祥符中嘗欲因四時首月入閣  
讀時令之儀而不果行之仁宗景祐中亦嘗詔儒臣講  
定時令一篇未幾亦罷時孫殊請詔禮官博士再定讀



時令之儀選明經術通知陰陽者各主一時時至明言

其職

經緯集

唐會要曰貞觀十四年正月命有司讀

春令於太極殿長安四年崔融日讀時令自魏晉創有此禮每歲立春立夏大暑立秋立冬常讀時令又命韋輻每月進月令一篇坐而讀之肅宗乾元中春讀春令德宗正元四五月迎氣之日令讀時令

後世時令書

月令章句東漢蔡邕撰

分十二月以中央

附夏季之末合十三篇各以章句解之今一卷非邕全

書也又唐玄宗刪定月令李林甫等注有序又李林甫有注解月令其序與刪定月令同而所序十二月專紀節候及氣令變異之應

隋杜臺卿有玉燭寶典以禮記月令分冠諸篇引經傳百家之說以釋之唐韓鄂有歲華紀麗探經史歲時雜事述以駢儷之語韋行規有月錄凡飲膳服餌種藝蓋藏之法皆附本月書之李綽有秦中歲時記紀唐室朔望薦獻及歲時宴賞之事

一名輦下歲時記一名咸鎬

歲時記 李邕撰金谷園記採傳記小說歲時雜事五代  
南唐徐諧撰歲時廣記掇古今傳記并前賢詩文隨日  
以甲子編類凡時政風俗耕農養生之事悉載

國朝賈昌朝撰國朝時令初景祐中丁度等承詔約唐  
時令為國朝時令以備宣讀最後昌朝又參以蔡邕高  
誘李林甫諸家月令之說為集解劉安靖撰時鏡新書  
以四時分十二月各繫其事孫岳撰備閱時令見賈昌  
朝所奏時令見失紹興中雖訪得之非復舊本乃以景

祐歷書考日月之合疏列分度併取一二名數注字音  
於下以備閱時之宜焉

並中興館閣書自修

月令疑孔穎達正義曰按鄭云名曰月令者以其紀十  
二月政之所行也本呂氏春秋十二月紀之首章也以  
禮家好事私合之後人因名曰禮記或云周公所作其  
中官名時事多不合周法此卷解者不同今且申鄭首  
釋之按呂不韋集諸儒首著為十二月紀合十餘人言  
名呂氏春秋篇首皆有月令與此文同是一証也又周

死太尉惟秦有之況月令乃云命太尉此是官名不同  
周法二証也又秦以十月建亥為歲首而月令云為來  
歲受朔日即是九月為歲終十月為受朔此是時不合  
周法三証也又周有六冕郊天逆氣則用大裘乘玉輅  
建太常日月之章而月令服飾車旂並依時色此是事  
不合周法四証也則月令不韋之作明矣按秦始皇十  
二年呂不韋死十六年并天下然後以十月首用十月  
時不韋已死而不韋不得以十月為正又云周書先有

月令何得為不韋所造又秦并天下為郡何得云諸侯  
又秦以好兵毒天下何能布德施惠春不興兵既如此  
不同而鄭氏必謂不韋作者何也蓋不韋集諸家作為  
一代大典亦採擇善事遵立舊章但秦自不能依行何  
怪不韋所作也

禮記正義

明堂月令論東漢蔡邕作也

謂之月令所以順陰陽本四時效氣物立王政也成法  
各從時月藏之明堂所以示承祖考神明明之不敢褻  
瀆之義故以明堂名者其篇自天地立位其象聖帝明

王也世有紹襲蓋以成大業非惟一代之事也易正月之卦曰益其經曰王用享于帝者蓋孟春月令曰乃擇元日祈穀于上帝顓帝歷曰天元正月己巳朔旦立春正月俱起於天廟營室五度月令曰日在營室堯典曰乃命羲和欽若昊天歷象日月星辰敬授人時月令曰乃命太史守典司天日月星辰之行易曰不利為寇利用禦寇月令曰兵戎不起不可從我始書曰歲二月同律度量衡中春令日夜分則同度量鈞衡石此皆合於

大歷古歷唐政戴記夏小正傳曰陰陽生物之後王事  
之次則夏之月令也商人无文及周而備文義深遠宜  
周公之所著也官號職司與周官合周書七十二篇而  
月令第五十三則月令周書明矣秦相呂不韋著書取  
月令為記號淮南王安亦取以為第四篇改名曰時則  
故偏見之徒或云月令呂不韋作或曰淮南作皆非也  
蔡中郎集呂氏春秋十二紀漢儒論次其月令措諸禮  
為大法焉其言十有二月七十有二候迎月步氣以追



寒暑之序類其物宜而逆為之備聖人之作也然而聖人之道不窮異有以為神不引天以為高利祿人備於事而已觀月令之說苟以合五事配五行而施其政令去聖道亦遠矣凡政令有候時而行之者有不候時而行之者是故孟春修封疆相土宜仲春止田獵備蚕氣孟夏瓦起土功季秋休百工孟冬築城郭仲冬伐木取竹箭季秋誨武習射御也固候時而行所謂敬授人時者也其餘郊廟百祀亦古之遺典不可廢誠使古之為

政者非春无以布德和令非夏无以行爵出祿非秋无以任有功誅暴慢非冬无以賞死事恤孤寡則其缺政以繁矣斯固不俟時而行之者也變天之道絕地之理亂人之紀舍孟春則可以有事乎作淫巧以蕩上心舍季春則可以為之乎又曰反時令則飄雨暴雨是特瞽師之語非出於聖人者也然則夏后周公之典逸矣

文

羣書考索卷五十五